

Արտատպված է՝ Ա. Տոլստոյ, Ինժեներ Գարինի հիպերբոլիդը; Աելիտա, վեպեր, Ե., «Սովետական գրող» հրատարակչություն, 1982:

Ալեքսեյ Տոլստոյի գիտաֆանտաստիկ վեպերը

Ռուս ականավոր գրող Ալեքսեյ Տոլստոյը մեծ ավանդ ունի հայրենական մշակույթի գանձարանում: Յուրահատուկ, բարդ ուղիով նա եկավ սովետական գրականության և իրավամբ արժանի տեղ գրավեց, իբրև խոսքի ժամանակակից խոշորագույն վարպետներից մեկը: Վառ տաղանդի տեր արվեստագետն ստեղծեց ամենատարբեր ժանրերի երկեր՝ պատմական վեպեր, պատմվածքներ, պիեսներ, քաղաքական պամֆլետներ, հրապարակախոսական հոդվածներ:

Նրա «Տառապանքի ուղիներով» եռագրությունը, «Հաց» վիպակը, «Պետրոս Առաջին» վեպը ժողովրդի լայն ճանաչման են արժանացել, դարձել միլիոնավոր ընթերցողների սիրած գրքերը, մտել սովետական գրականության ոսկե գանձարանը:

Ալեքսեյ Տոլստոյը խոշոր վաստակ ունի նաև գիտաֆանտաստիկական վեպի ասպարեզում: Այդ ժանրի նրա ստեղծագործությունները՝ «Աելիտա» և «Ինժեներ Գարինի հիպերբոլիդը» հայտնի վեպերը սկզբնավորեցին սովետական գիտագեղարվեստական ֆանտաստիկան, որ իր վառ արտահայտված հատկանիշներն ունի:

Գիտաֆանտաստիկական գրականության երկերի սյուժեները սովորաբար կառուցվում են մարդու և բնության բախման վրա, բացահայտում գիտական և տեխնիկական հայտնագործումների հրապուրիչ աշխարհը: Միաժամանակ գիտաֆանտաստիկական շատ վեպերում, առանձնապես 19-րդ դարի վերջի և 20-րդ դարի սկզբի գործերում, պարզորոշ ուրվագծվում է սոցիալական թեման: Ա. Կոնան Դոյլի «Կորոսյալ աշխարհ», Բ. Զելերմանի «Թունել», Զ. Ուելսի «Ժամանակի մեքենան», «Աշխարհների պայքարը» երկերում տարբեր կերպ են բացահայտվում կապիտալիստական հասարակության հակասությունները, որ սովորաբար միայնակ հերոսին հասցնում են շրջապատող միջավայրի հետ ժամանակավոր կամ մշտական բախման:

Սովետական գիտաֆանտաստիկական վեպը ապագա տեխնիկական հայտնագործումների անսխալեղ հեռանկարներ բացելով, հատկանշվում է գիտական և հասարակական թեմայի նոր լուսաբանմամբ, հիմնական հերոսի նկարագրի պրոբլեմի նոր լուծմամբ: Եթե ավանդական բուրժուական վեպում իբրև կենտրոնական գործող անձ հանդես է գալիս առավելապես ուժեղ, միայնակ անհատը, ապա՝ սովետական գրականության մեջ առաջին պլան քաշվեց մի այլ հերոս՝ նոր հասարակության ներկայացուցիչը, որ իրեն անբաժան է զգում սովետական ժողովրդից: Նման նոր հերոսի հատկանիշները նկատելի են արդեն Ալեքսեյ Տոլստոյի «Աելիտա» և «Ինժեներ Գարինի հիպերբոլիդը» գիտաֆանտաստիկական վեպերում, հանձին Գուսևի և Շելգայի: Այս երկերի պաթոսը ժողովրդի, հայրենիքի հետ միասնության, նոր կյանքի ստեղծման ձգտումն է, որով համակված են հերոսները, և որի շնորհիվ նրանք տոգորվում են գործելու եռանդով, ապագայի հավատով ու դառնում անպարտելի: Միաժամանակ արվեստագետը ցույց է տալիս դատապարտվածությունը բոլոր նրանց, ովքեր իրենց հակադրում են ժողովրդին: Իրեն գերմարդ երևակայող անհատապաշտ Գարինի կերպարում Ալեքսեյ Տոլստոյը պսակագեղծում է ավանդական «միայնակ հերոսներին», ի ցույց դնում ռոմանտիկայից գերծ նրանց էությունը:

Ալեքսեյ Տոլստոյի գիտաֆանտաստիկական երկերը գեղարվեստական առումով ունեն այնպիսի հատկանիշներ, որ բնորոշ են գրողի ամբողջ ստեղծագործությանը՝ պատումի

ռեալիստական երանգավորում, սոցիալական-փիլիսոփայական թեմայի լայն մարմնավորում, հերոսների սոցիալական և հոգեբանական բնութագրման բազմակողմանիություն և հստակություն: Նրա համար բնորոշ է հասարակական խոշոր իրադարձությունների էպիկական վերարտադրումը:

Սակայն Ալեքսեյ Տոլստոյի ռեալիստական արվեստը միշտ էլ մարդկային է. ինչ էլ պատկերի գրողը, նրա ուշադրության կենտրոնում մարդն է՝ իր դրսևորումների ողջ բազմազանությամբ:

«Ինժեներ Գարինի հիպերբոլիդը» վեպն աչքի է ընկնում բարդ և գրավիչ սյուժետային գծով, սուր կոնֆլիկտներով, հարաճուն գործողությամբ: Գրողն այստեղ հասել է ճշմարիտ հետաքրքրաշարժության, որ մեծապես կանխորոշել է երկի հաջողությունն ընթերցողների շրջանում:

Ալեքսեյ Տոլստոյը մեծ նշանակություն էր տալիս իր երկերի գիտական կողմի ճշգրտությանը: Գեղարվեստական ստեղծագործության մեջ շոշափվող տեխնիկական պրոբլեմի համակողմանի ուսումնասիրումը նա պարտադիր պայման էր համարում գիտաֆանտաստիկական ժանրի երկ ստեղծելիս:

Այս կապակցությամբ նա վարպետության վերաբերյալ հարցաթերթիկում գրել է. «Ես օգտվում եմ ամեն տեսակ նյութերից, սկսած մասնագիտական գրքերից (ֆիզիկա, աստղաբաշխություն, գեոքիմիա) մինչև անեկդոտներ: Երբ գրում էի «Ինժեներ Գարինի հիպերբոլիդը» (իմ վաղեմի ծանոթներից մեկը՝ Օլենինը, նման կրկնակ հիպերբոլիդի ստեղծման հավաստի մի պատմություն է արել ինձ: Այդ գյուտի հեղինակը մեռել է 1918-ին, Սիբիրում), ստիպված էի ծանոթանալ մոլեկուլային ֆիզիկայի նորագույն տեսություններին: Ինձ շատ օգնեց ակադեմիկոս Լազարևը»:

Արկաճային սյուժեն, սոցիալական և գիտական հետաքրքրաշարժ ֆանտաստիկական «Ինժեներ Գարինի հիպերբոլիդը» վեպում զուգորդվում են այժմեական և հրատապ քաղաքական թեմային: Երկի գլխավոր գաղափարը կապիտալիստական հասարակության մեջ գիտության ճակատագրի պատկերումն է, բուրժուական գրականության մեջ տարածված անհատապաշտ հերոսի, «ուժեղ անհատի» պսակազերծումը, աշխարհի վրասասահմանափակ դիկտատուրա հաստատելու՝ կապիտալիստական մոնոպոլիաների վերնախավի ձգտման մերկացումը:

Գրողը կապիտալիստական աշխարհի պատկերը ներկայացրել է վատ, եսասիրական զորությամբ լի կերպարներով, տպավորիչ բնութագրումներով:

Ալեքսեյ Տոլստոյի գիտաֆանտաստիկական երկերի սոցիալական թեման պատմական իրականության ռեալ փաստերի ծնունդ է: Դեռ քսանական թվականների սկզբին գրողը խորաթափանցորեն նկատել է ֆաշիզմի՝ պլուտոկրատիայի իշխանության առավել ռեակցիոն, բացահայտորեն տեռորիստական ձևի սկզբնավորումը, որ նպատակ ուներ ճնշել աշխատավորության ազատագրական շարժումը:

Գրողը մեծ համոզչությամբ է ընդգծում ժողովուրդների անպարտելիության գաղափարը, ողջ մարդկությանը ստրկացնել տենչող իմպերիալիստական բոլոր ավանսյուրիստների կործանման պատմական անխուսափելիությունը: Աշխարհի բախտն, ի վերջո, աշխատավոր ժողովրդի ձեռքին է: Եվ օրինաչափ է «Ինժեներ Գարինի հիպերբոլիդը» վեպի ավարտը, որ ցույց է տալիս ժողովուրդների ամենագործությունն ու աշխարհը նվաճելու ցնորական գաղափարների ձախողումը:

Ալեքսեյ Տոլստոյի երկերը, այդ թվում նաև «Ինժեներ Գարինի հիպերբոլիդը» վեպը, ակնառու կերպով բացահայտում են հեղինակի կրքոտ ձգտումը՝ քայլել կյանքին համընթաց.

ռեալիստորեն ճշմարտացի պատկերել իրականությունը, արվեստի միջոցներով սեփական պատասխանը տալ հասարակական սուր հարցերին:

Վ. ՃՉԵՐԲԻՆԱ